



partii naleraq

UPA 2016/098-01

12.05.2016

**Narsami illumik nutaaliorfimmik 300 m<sup>2</sup>-isut angissusilimmik pilersaarusiortoqarlunilu sanasoqarnissaanut Naalakkersuisut FLL17-imi aningaasaliinissamut peqquneqarnissaannut Inartsisartut aalajangiiffigisassaattut siunnersuut. Illumi nutaaliorfiusumi nutaaliortiternissap siuarsarneqarnera inuussutissarsiutitigullu siursaaneq sulissutigineqassapput, taakkunani ilaallutik takornariaqarnermi ingerlatassat kiisalu sumiiffinni pissaritit aallaavigalugit tunisassiassanik inerisaanerit, tassa kujataani pisuussutit uumassusillit uumaatsullu pigineqartut aallaavigalugit tunisassiornikkut umminut pilersorneq siuarsarneqarsinnaaqqullugu. Nutaaliorfiup ingerlanneqarnera Namminersorlutik Oqartussanit isumagineqassaaq.**

(Inatsisartunut ilaasortaq Aqqaluaq B. Egede, inuit ataqtigiit

Inatsisartunut ilaasortaq, Aqqaluaq B. egede, inuit Ataqtigiinneersup siunnersuutaa, tassa Narsami illumik nutaaliorfimmik 300 m<sup>2</sup>-sut angissusilimmik pilersaarusiortoqarlunilu sanasoqarnissaanut Naalakkersuisut aningaasanut inatsimmut 2017-mi aningaasaliinissamut peqquneqarnissaannut iNatsisartut aalajangiiffigisassaattut siunnersuut. Illumi nutaaliorfiusumi nutaaliortiternissap siuarsarneqarnera inuussutissarsiutitigullu siursaaneq sulissutigineqassapput, taakunani ilaallutik takornariaqarnermi ingerlassat kiisalu sumiiffinni pissaritit aallaavigaalugit tunisassiassanik inerisaaneq, tassa kujataani pisuussutit uumassusillit uumaatsullu pigineqartut aallaavigalugit tunisassiornikkut imminut pilersorneq siuarsarneqarsinnaaqqullugu. Nutaaliorfiup ingerlanneqarnera Namminersorlutik Oqartussanit isumagineqassasoq imannak Partii Naleqqamiit oqaaseqarfigissuarput.

Siullermik siunnersuuteqartumut qujanaq siunnersuummut.

Taama siunnersuuteqarnerit tupinnartuliatut oqaatigineqarsinnaanngilaq, tassami naluneqanngitsutut nunatta kujataa, pingaartumik aamma Narsaq sumiiffinni allanisuulli suliffissaqartitsiniarnikkut ajornartorsiuteqarfiuvoq.

Immaqa ingasattajaarnerussanngilaq oqaraanni, Narsaq inuussutissarsiutinik ingerlataqarniarnermi ajornartorsiorfiunerpaat ilagaat, taamaattumik aamma tupinnanngitsumik inuppasuit ukiut kingullit ingerlanerini allamut nuuttariaqartarsimapput.

Taamaammat siunnersuutip sutigut piviusunngortinneqarsinnaaneranut periarfissat, soorlu siunnersuuteqartup oqaatigingai, aallarnisaanissanut tunngasutigut assigiinngitsunik periarfissaqareenera iluatinnaateqarmat, suliakkiissutip ataatsimiititaliami susassaqarfiusumik suliarineqarnissaa soqutingaarput.

Isumaqarpugut siunertaq periarfissanut assigiinngitsunut atorluarneqarsinnaasoq, tassami ungasinngitsukkut ilinniartitaanermit tunngasut inimi maani eqqartorpavut. Tassungalu tunngatillugu, ilinniartut ilinniarnermi sungiusarfissaaleqisarnerat aamma eqqartorneqarpoq.

Isumaqarpugut una periarfissatsialak isumatumik aaqqissuunneqaruni, Narsarmiunuinnaanngitsoq, kisiannili nunatta sinneranut iluaqutaalluinnarsinnaasoq.

Suliffissaaleqineq annertoqaaq, tamatta kissaatigaarput suliffissat aningaasarsiorfissallu nutaat pilersinneqarnissaat.

Isumaqarpugut illorsuaq pineqartoq sananeqarsinnaanngippat aamma pisortat illuutaasa pioreersut ilaanni aaqqissuussinikkut siunertaq piviusunngortinneqarsinnaasoq, tamannalu qularnanngilaq kommuni kujalleq qanimut suleqatigalugu naammassiniarneqarsinnaassasoq aamma eqqarsaatigineqarsinnaavoq.

Taamaattumik siunnersuut soqotiginartillugu tunngaviatigut taperserparput, ataatsimiititaliamilu suliarineqarnissaa inassutigalugu.